

Vancouver Islandimi ilinniarnera

Ivalo & Minik Fonden pissutaalluni takorluugara piviusunngorpoq, tassa Vancouver Island Universitymut ilinniariartorpunga.

Semesteri ataaseq qaammatinik tallimangajannik sivisussuseqartoq, inuuninni aatsaat taama allannguutaatigisumik nukkassaataatigisumillu aqquaagaqarpunga. Kalaallini siullersaallunga Vancouver Islandip ilinniarfissuani ilinniarpunga, aasaq mannalu Erfalasorput nunat tamalaaneersut allaffianni qilaavanut nivinngarneqarpoq, nunani allaneersut erfalasorpassui assingalugit.

Siorna KNR Radiomi praktikkerninni paasivara IVALO & MINIK FONDEN-imit ilinniariartornissannut tapiinissaminut akuerisimagaannga. Januarimilu 2016-mi qaammatit sisamat sinnilaarlugit Canadami Vancouver Island Universitymi ilinniartussanngorlunga.

Semesterimi ataatsimi fagitut uku toqqarpakka:

Tusagassiutilerineq, Creative Writing Journalism

Intro to Digital Media

Nunap inuiisa oqaluttuarisaanerat, Exploring Indigenous Communities

Canadamut tikeeqaarama ilimagisannit inui assut ikiuukkumatunaarpakka oqaloqatikkuminarlillu. Aallaqqaammut tassanngaannartumik tuluttuinnaq oqaluinnalerneq pikkunalaarluarpoq sungiussassaallunili.

Ilinniarfissuaq angisoorsuuvoq allaffippassuaqarluni taamatullu ilinniartunut klasserpassuaqarluni. sutorniartarfeqarpoq marlunnik, immikkut ilinniartunut imerniartarfeeraqarpoq, eqaarsaartarfeqararluni, katerittarfeqarpoq, immikkut atuakkanik atorniartarfeqarpoq quleriulluni tallimanik initialik.

Ilisimatusarfik pillugu paasissutissat:

Ilinniartut aammalu ilaannakortumik ilinniartut 16.000-pput.

Nunanit tamalaaneersut katillugit 1.800

Ilisimatusarfimmi sulisut 2.000-iullutik.

Taamaammat ilisimatusarfissuaq mikigisassaanngilaq, qaammatinilu sisamani ilinniarninni tamakkerlugu iserfiginngilara.

Kalaaliunera tupigineqartaqaaq

Nuna sermiinnarsuaq inuuuffigineqanngilaq uumassuseqaranilu – Taama Nunarput nunanit allaninngaanneersunit isigineqartartoq kalaaliusugut nutaarsiassarinngilarput.

Vancouver Islandimut tikeeqaarninniilli aallarnissara tikillugu nassuiaasarpunga sumerpiamiinnersoq, qanoq inooriaaseqarnersugut, oqaatsivut pillugit, aammalu upernarlatalu aasartartugut.

Ataaseq puigunngisaannassuara angut utoqqannguaq taxarfigisara, sumunnarfissannukarnitsinni oqaloqatigerujoorpara, sumiorpaluuteqalaartunga malugalugu aperivoq suminngaanneernersunga. Akivara Kalaallit Nunaanneerlunga, VIU-milu ilinniartuullunga. Tupaqqangaarluni uppererpasinnanga qiviarpaa, apeqqutinillu kisissaanngitsunik apersuilerluni. Ilumoortukassaallunga oqaluttuuppara paaserusutaanik, ingerlanerpullu soorlu sukkatseriasaaginnartoq. Suli ingerlatilluta assani isaammagu kutaarpara, annguna oqaleriallartoq kalaallimik kutaarsisimaniassagami assammikkusullunga. Alutorsavittoq qungujulaqisorlu qimappara.

Taannaannaanngilarlumi, ilinniartoqatikka aammalu illoqarfiup iluani naapitakka apersortut oqaluttutissallugit nuannarisaqaakka.

Angalalluni takornariarnerit

Sapaatit akunnerisa naanerini timersortarfik imaluunniit nunat tamalaaneersut allaffiannit neqerooruteqartarput akiliilaarluni Vancouver Islandip iluani takornariartinneqarsinnaalluta.

Taavaniinninni anguakka, januarimi aputisiuteqarlunga maakkarnaveeqqutit qaqqarsuarmut Mount Washingtonimukarpugut. Silaginnera nalaarlularlugu qummut ingerlaarpugut, takusallu assut alutornavippu. Silaanna nillataarluni aputeqarluartoq seqinnarissorsuovoq kialaartitseqisumik. Orpippassuit akornisigut ingerlaleraangatta aputit orpinniittut nakkaarpalulernerat tusarsaasarloq, ilaatigullumi ilannguagut eqqorneqartarlutik.

Januaari naangajalersoq nillataartoq suli aputeqaranili illoqarfeerannguamut Tofinomut atilimmut unnuiaartorpugut, orpippassuit takornariaatigalugit sissartai

tusaamaneqarluartut immap qaatigut saarlisaarfingissallugu assut nuannarineqartarlutik. Orpippasuarni sivisuumik pisuppugut oqaluttuassartaallu ilisimatusarfimmi sulisunit angalatitsisutsinnit oqaluttuarineqarlutik. Orpippasuarniinneq eqqissisimanaqaaq, nipaalluni tipigilluni isugutalaarluni, timmiaararpalaaq, immap sissamut qaartarneri tusarsaapput, nattoralissuillu angeqisut aarsaarlutik qulaatillattaarpaatigut.

Sapaatip akunnerata tulliani Vancouverimukarpugut ikaartaammut ilaalluta, tassani akvariani uumasut nunanit assigiinngitsuneersut takusarlugit. Qilalugaq qaqrtaq aamma uumasuusivissuarmiittoq takornariarpalput, mattagummernangitsuunngilaq. Kalaalimerngit assut maqaasinartarput, assigusunillu nerisassanik taavaniinninni pissaqarnanga.

Januaari naasoq Horne Lake Cavesimi qaarusunnut assigiinngitsunut pingasunut pulattarpugut. Pulattarfiitta ilaat paarngorfissaasaramik eqqissisimaannarniarneq unammillernarsinnaasarloq, aammalu qaarusunni kooqartiterneranni isikkagut eruilluinnartut angerlamukarpugut.

Februaari aallartilaartoq Tofinomukaqqippunga, tassani takusassat allaanerit takornariarpagut, sissat isorartoqisut pisorujoorfigaagut tassani immikkut ilinniarfissuarmi ilinniartumik assiliisulerluta. Siullermiit mallerneroqaaq immap qaavatigut saarlisaartorpassuupput isiginnaarlugit alutornavillutik.

Februaari naajartulersoq ilinniarnitsinni misilitseqattaalinnginnitsinni atuanngiffeqalaarpugut. Tamanna atorluarniarlugu kammalaatikkalu illoqarfimmuit Whistlerimut sisorariartarfilimmukarpugut, inuit ukiut tamaasa 2 millionit missaanniittut sisorarfigisartagaat. Tusaamaneqaatinilu eqquutsivillugu assut sisorartarfigippoq, meeqqaniit utoqqarnut sisorarfigineqartarluni.

Kammalaatikkalu Whistlerimeereerluta aqaguani ilinniarfissuup takusassarsiortitsineranut peqataavugut, Canadap kulturianut ilaasoq nuannarineqarluartorlu tassa ishockertunut isiginnaariarpugut. Tassani canadamiut amerkamiunut unammippuit, canadamiut 1-4-mik ajorsarput. Timersortarfik inunnik aalaaluppoq ulikkaarluinnarlunilu.

Marsi aallartittoq illoqarfimmuit Ladysmithimukarpugut, kuussuit alakkarlutigit. Qaqqajunnat portujaartukkut qummukarpugut, kuussuillu sialleqattaaqqammernikuummat assut kuupput.

Marsip qiteqqunnerani Coombs Marketimukarpugut busserluta, tassani ujaqqat assigiinngitsut uumasut assiginik ilusilersukkat takornariarpagut. Uumasunillu

ajoquusersimasunik paaqqinnittarfik takornariarpalput, nattorallit, timmissat assigiinngitsut, uppiit, kissaviarsuit, nanu-qernertorlu ataaseq takusatta ilagaat.

”Sapiissuseqarlutit imminut misilerartuaannarit uniffissarsiornak, misilitakkavit aqqlusaakkavillu kinaanernik uummarissaataassapput.”

Radioqarfiit pulaarpakka

Radiomi nammineq kajumissutsiminik sulisup ilinniarfissuarmi aamma ilinniartuuusup oqarfigaanga illoqarfiup radioani CHLY 101.7-kkut pulaartoralunga apersorusullunga. Radio taanna illoqarfiup Nanaimop qeqqaqqinnaaniippoq, illup imerniartarfiusup ataaniilluni. Iserama piginnittua toqqaannartumik aallakaatitseruortoq nipilersukkanik akunniliillattaajutigisoq tusarnaarpara. Radiop silaannaa assut eqqisisimanaarpooq, sulsui marluk inuusuttut piginnitorlu imminnut sungiusimalluarlutik eqqisisimallutillu aallakaatitseruortut alutornavipput. Nunarput pillugu apersorpaannga, silarput nunarpullu qanoq isikkoqarnerinik aperisarput aammalu kalaallisut oqaaseqartuunerput soqutigilliunnarpaat. Apersorneqarnerma unikaallannerani piginnittoq aperaara kalaallisuumik nipilersukkamik appissinnaanersoq, aperisara aalaniarpallaqaqaaq. Sumékkut erinniaralugulu taalliaat Qaallorimmi illinersiorata Nanaimomi najugaqartut tusarnaartunut tusartippara. Piginnittup Sumékkut nipilersoniaasaat nuannarisorujussuuai.

Taanna radioqarfik anginngittooq pulaareerakku ullu alla illoqarfimmut Victoriamut busserlunga nutaarsiassaqartitsivik CBC Radio takornariarpala. Tassani ittuusoq oqaloqatigilluarpara taamatullu sulsui qulit missaaniittut suliaat pillugit paasiniaavigalugit. Ualikkut pingasuniit akunnerni pingasuni toqqaannaqattaarneranni aallakaatitsivimmut ingillunga qanoq suleriaaseqarnersut qanorlu toqqaannarnerminni aaqqissuussisarnerat malinnaavigaakka. Sulisut inuppalaarput iserfigiuminarlutillu, ulappukkaluarlutik oqaluttuarfiginissannut piffissaqarlutik nassuiaasarput. Nunatsinnut soqutiginninnertik takutippaat siunissami suleqatigiilernissamik takorluugaqalereeramik, neriullutillu Nunatsinniit nutaarsiassanik CBC Radiokkut tusarliussisarumaarlutik. Radiot assigiinngitsut marluk, nutaarsiassaqartitsivik aappaalu eqqisisimasoq pilikaffiulaarsinnaasoq taamaalillunga pulaarpakka.

Qaasaaneq/Kaffillerneq

Ilisimatusarfissuaq taama angitigisoq sooruna imminnut attaveqarfinginiarnerat ungasippoq ataqatigiittorsuunatillu. Taavaniinninni eqqarsalerpunga Arctic Winter Gamesertoqarnerani nunanit tamalaaneersut taama amerlatigisut naapisinniarlugit. Pilersaarusrusiorlugu aallartikkingalu ilinniarnitsinni semesterip affaanut killikkatta misilitsittussanngorpugut, tassanilu ataatsimoortitsinissara piviusunngungitsoorluni. Pisussat pereermata aalajangerpunga ilinniarfissuarmi unitsinnata sulisut ilinniartullu ataatsimuualartaarttariaqarlugit, taamaaliorninni aamma Nunarput nittarsaanniassagakku. Pilersaarusrusiornera oqitsuinnaanngilaq ilinniagassat saniatigut ingerlakkakit, ikiorteqaleriararamali ilinniartunik sullissivimmiit assut iluaqtigeqaara. Aprilip arfineq aappaanni inaarutaasumik misilitsinnerit aallartingjalersut ilinniarfissuarmi ilinniartitsisut ilinniartullu piumasut takkupput. Uannut inuit pingaarutillit sisamat ilinniarninni ikiortaalluarnikut nammineq naasunik qilertanik tunivakka. Unnuk ammaarpala oqalungiarlunga qanoq ingerlasimaninnik aammalu sooq Vancouver Islandip ilinniarfissuanut ilinniariartornerlunga. Taamaaleriarlunga ikinngutima ilai ilagalugit erinarsorpugut, kalaallisullumi aamma erinarsorlunga. Nerinerup nalaani piumasut oqalugiallattaarput, erinarsunngikkunillu atuffassisarlutik. Unnuk alutornavissoq akunnerni marlunni ingerlapparput, ilinniartitsisup oqarfigaanga aatsaat ilinniartumik taamatut ataatsimoortitsisumik takulluni assut nuannisarsimalluni.

Nunanit allaneersut allaffeqarfiani marlunngornikkut piumasut kulturiminnik nerisassartalimmik unnussiuuaartitsisaramik, tassani unnussiuuaartitseqqippunga kaagillerlunga tupigusuutigisannillu inoqarujussuanngikkaluartoq sukkaannaq kaagit nunguppaat.

Qaammatini sisamani sinneqalaartuni ilinniarnera taamaasillugu naammassivara, tamannalu Ivalo & Minik Fonden pisinnaasimavoq. Tusagassiortunngorniatut inuttullu pissarsiaqaatigeqisannik sakkussanillu aallerfigisannik.

Imminut upperinissaq, nalunagu sapernagu inuttullu nakkarnermi pingaartorujussuuvoq ammalluni ikiortissarsiornissaq. Kisimiilluni angalalluni nalunngisartaarnissaq pingaartuuvoq taakkuummata tasiortissat, kammattaallu inuunermut ilaalersussat.

Tusagassiortunngorniarlpunga, aallarteqqaaramalu 2013-mi paasigakku nunamut allamut aallarluni ilinniartoqarsinnaasoq, aalajangerpunga periarfissaq pitsaaqimmat atorluarniarlugu.

Aaliangiussamalu piviusungortinnissaa assut qilanaarisimavara.